

Green Gateway Aruba ta brinda empresanan un oportunidad unico

Carbon War Room: “Aruba t’e ehempel pa mundo”



DELFT – Prome Minister Mike Eman a tira un tremendo discurso na Delft pa un sala yena di empresario, inversionista y cientificonan di Hulanda y algun otro pais Europeo. Den su discurso Eman a splica di e ambicion cu tin pa haci di Aruba un comunidad duradero. Un reto y ambicion cu a cay den bon tera cerca tur presente.

Prome Minister Eman tabata un di e oradornan invita n’e encuentro ‘Sustainable Aruba: Investment Opportunities’ cu a wordo organisa dor di e compania Bluerise hunto cu Carbon War Room. Meta di e encuentro aki ta pa mostra empresario y inversionistanan riba e posibilidad cu nan tin pa hunga un rol den realisa e meta di Aruba pa poco poco haci Aruba menos dependiente di combustibel fosil cu ta contamina y caro. Eman a acepta e invitacion pa ta orador n’e evento aki cu tur dos man, pasobra di e forma aki e por duna un mihor bista riba su maneho.

“Prosperidad na Aruba a crece grandemente den e ultimo 25 añanan, pero e bienestar no a crece pareu cune. Esey t’e motibo cu na Aruba nos no kier sigui crece den cantidad, pero den calidad. Asina nos no kier mas kamber di hotel, pero si di calidad mas haltu”. Reemplaza petroleo como combustibel den energia solar y di biento ta parti di e maneho aki. E isla ta bira mas limpi, esey ta haci e isla mas agradabel pa biba y pa bishita y e gastonan di coriente ta baha enbes di sigui subi cada bes cu prijs di petroleo subi.

Riba dje Aruba na caminda pa bira 100% ‘berde’ ta haya mas ‘know how’ cu por wordo ofrece na otro paisnan riba base di consultancy. Di e forma aki ta construi un di tres pilar economico cu tin como resultado funcionnan di nivel haltu pa Arubianonan bon studia cu awor ta trahando den exterior.

“Nos ta mira e durabilidad mas amplio cu solamente energia”, Eman a comenta. El a invita tur presente pa bin Oranjestad na luna di mei pa participa n’e conferencia ‘Europe meets the Americas’. “Den Latino America tin hopi de-

manda pa experticio riba tereno di tecnologia duradero. Bin Aruba y bo ta bay bek cu clientenan nobo”. Cu e chens ey ta grandi a wordo confirmador di Ssenior Manager Caroline Rodenburg di Ernst & Young cu bou supervision di ex Prome Minister Hulandes Jan Peter Balkenende y riba peticion di Gobierno di Aruba, a haci un investigacion pa saca afo si Aruba ta bay ta exitoso si e posiciona su mes como gateway entre Europa y Latino America.

E investigacion ta indica cu Aruba tin tur loke tin mester pa bira un ‘Showcase sustainable island’. Pa por claim e status ey lo ta bon pa institui un zona berde cu e prome Green World Trade Center di mundo na unda empresanan riba tereno di durabilidad ta establece nan mes, asina Rodenburg a bisa.

E prome cu ta bay haci uzo di un zona berde asina sin duda ta TNO. CEO Jan Willem Kelder den su discurso a expresa cu no ta duel TNO ni un seconde di a habri un filial na Aruba. Kelder a conta esnan presente di e ‘smart community’ cu ta wordo construi na Aruba. Esaki ta un barrio di 20 cas cu ta wordo getest dor di TNO cu e ultimo riba tereno di tecnologia berde, pa despues uza esaki den e resto di e isla y sigui pa otro paisnan. Pasobra, asina Director di Carbon War Room José María Figueres y Chief Operational Officer Peter Boyd, a bisa “Aruba t’e ehempel pa mundo.

Vision, dinamismo y sosten cu ta e exigencianan, t’ey caba. Esaki ta loke ta haci Aruba asina excepcional den un mundo caminda politicianan spanta dor di e crisis kier bay bek den tempo y no ta enfoca riba futuro”, Figueres a splica. “Aruba ta ofrece un oportunidad unico na empresarianan. Esaki t’e momento pa dicidi pa participa”.



Find us on
Facebook Like
www.facebook.com/AWEMainta